



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr._____, datë _____.2025

PËR

**PROPOZIMIN E PROJEKTLIGJIT “PËR DISA SHTESA DHE NDRYSHIME NË
LIGJIN NR. 9920, DATË 19.5.2008, “PËR PROCEDURAT TATIMORE NË
REPUBLIKËN E SHQIPËRISË”, TË NDRYSHUAR”**

Në mbështetje të nenit 81, pika 1, dhe nenit 100, të Kushtetutës, me propozim të Ministrit të
Financave, Këshilli i Ministrave,

V E N D O S I:

Propozimin e projektligjit “*Për disa shtesa dhe ndryshime në ligjin nr. 9920, datë 19.5.2008, “Për procedurat tatimore në Republikën e Shqipërisë”, të ndryshuar*”, për shqyrtim dhe miratim në Kuvendin e Republikës së Shqipërisë, sipas tekstit dhe relacionit shoqërues, që i bashkëlidhen këtij vendimi.

Ky vendim hyn në fuqi menjëherë.

K R Y E M I N I S T R I

EDI RAMA



REPUBLIKA E SHQIPËRISË
KUVENDI

PROJEKTLIGJ

Nr. _____, datë _____.2025

PËR

**DISA SHTESA DHE NDRYSHIME NË LIGJIN NR. 9920, DATË 19.5.2008, “PËR
PROCEDURAT TATIMORE NË REPUBLIKËN E SHQIPËRISË”, TË NDRYSHUAR**

Në mbështetje të nenit 78, nenit 83, pika 1, dhe nenit 155 të Kushtetutës, me propozimin e Këshillit të Ministrave, Kuvendi i Republikës së Shqipërisë,

VENDOSI:

Neni 1

Në nenin 23, pikat 2, 3 dhe 4, ndryshojnë me përmbajtje si më poshtë:

“2. Vlerësimet, njoftimet, vendimet dhe komunikimet zyrtare të administratës tatimore, drejtuar tatimpaguesit, i njoftohen atij duke ia dërguar në llogarinë e tij elektronike në sistemin tatimor (e-filing) dhe/apo nëpërmjet shërbimit postar rekomandë.

3. Aktet e përcaktuara në pikën 2, të këtij neni, dhe çdo korrespondencë tjetër që i dërgohet tatimpaguesit nga administrata tatimore, konsiderohen të marra nga tatimpaguesi jo më vonë se dhjetë ditë kalendarike pas datës së dërgimit të mesazhit elektronik apo të postës rekomandë. Për njoftimet elektronike, datë e njoftimit është data e nisjes së mesazhit elektronik dhe për dokumentet e dërguara me postë rekomandë, datë e njoftimit është data e pranimit të dokumentit nga shërbimi postar. Për qëllime të përcaktimit të fillimit të afatit për marrjen e akteve tatimore, sipas këtij ligji, në llogaritjen e afateve në përputhje me Kodin e Procedurave Administrative nuk përfshihet dita në të cilën del akti.

4. Tatimpaguesi është i detyruar të deklarojë të dhëna të sakta të lidhura me adresën dhe postën elektronike, në mënyrë që të sigurojë marrjen në kohë të njoftimeve.”.

Neni 2

Në nenin 40, pas pikës 1, shtohet pika 1/1, me përmbajtje si më poshtë:

“1/1 Veprimtaria ekonomiko-tregtare, në kuptim të këtij neni, përfshin edhe veprimtarinë e ushtruar nëpërmjet internetit. Personat fizikë, individ tregtarë dhe të vetëpunësuar, dhe entitetet që ushtrojnë veprimtari ekonomiko-tregtare sipas kësaj pike, duhet të publikojnë në faqen e internetit nëpërmjet së cilës kryejnë këtë veprimtari të dhënat si më poshtë vijon:

- a) numrin e NIPT-it,*
- b) emrin e subjektit tregtar,*
- c) adresën e selisë,*
- d) numrin e telefonit.*

Kur administrata tatimore identifikon persona që ushtrojnë veprimtari ekonomiko-tregtare nëpërmjet internetit dhe nuk kanë publikuar në faqen e tyre elektronike këto të dhëna, u dërgon një njoftim zyrtar për publikimin e tyre.

Nëse brenda 15 ditëve nga marrja e njoftimit zyrtar, nuk merren masa për publikimin e të dhënave, administrata tatimore i kërkon Autoritetit të Komunikimeve Elektronike dhe Postare bllokimin e përkohshëm të faqes së internetit përmes së cilës ushtrohet aktiviteti.”.

Neni 3

Në nenin 41, në pikën 1, në fjalinë e dytë, pas togfjalëshit “*sipas pikës 2, të nenit 121, të këtij ligji*”, shtohen fjalitë me përmbajtje si më poshtë:

“si dhe masat e tjera administrative që parashikon ky ligj për të gjitha shkeljet e konstatuara nga administrata tatimore. Për mallrat e konstatuara pa faturë bëhet rivlerësimi i TVSH-së dhe detyrimeve përkatëse tatimore bazuar në vlerën e tregut.

Në rast të mospërbushjes së detyrimit për regjistrim, detyrimet tatimore dhe penalitetet që lindin sipas paragrafit 1 të këtij neni, zbatohen nga administrata tatimore ndaj tatimpaguesit individit.”.

Neni 4

Në nenin 44, pika 7 shfuqizohet.

Neni 5

Në nenin 59, bëhet ndryshimi dhe shtesa si më poshtë:

1. Pika 1 ndryshon me përmbajtje si më poshtë:

“1. Tatimpaguesit, personat fizikë, invididë tregtarë dhe të vetëpunësuar, apo entitetet nuk mund të kryejnë ndërmjet tyre transaksione shitjeje ose blerjeje me para në dorë, kur vlera e transaksionit është më e madhe se 100 000 lekë.”.

2. Pas pikës 2, shtohet pika 3, me përmbajtje si më poshtë:

“3. Personat fizikë, invididë tregtarë dhe të vetëpunësuar, apo entitetet nuk mund të kryejnë transaksione shitjeje ose blerjeje me para në dorë me individë, kur vlera e transaksionit është më e madhe se 500 000 lekë.”.

Neni 6

Pas nenit 59/2, shtohet neni 59/3 me përmbajtje si më poshtë:

“Neni 59/3

Pajisja me terminal “POS”

1. Tatimpaguesit, që kryejnë shitje me para në dorë, duhet të jenë të pajisur me terminal POS në çdo pikë shitje, sipas kalendarit më poshtë:

a) Brenda datës 30 maj 2026, të gjithë tatimpaguesit të cilët:

- i. ushtrojnë aktivitet ekonomik si struktura akomoduese, sipas përcaktimeve në ligjin për turizmin, dhe konkretisht: “Bujtinë”; “Bllok Apartamentesh”; “Motel”; “Fjetje dhe mëngjes”; “Hotel”; “Hotel i shpërndarë”; “Resort” dhe “Strukturë Akomoduese e Trashëgimisë Kulturore”;*
- ii. ofrojnë shërbime në sektorin e transportit;*
- iii. institucionet publike dhe shoqëritë publike me kapital shtetëror, pamvarësiht nga përqindja e pjesëmarrejes.*

b) Brenda datës 31 dhjetor 2026, të gjithë tatimpaguesit e tjerë, të papërmendur në shkronjën a të këtij neni.

2. Përfshihen nga detyrimi i pajisjes me terminal “POS”:

- a) Tatimpaguesit që ushtrojnë aktivitet ekonomik në zonat ku nuk ka mbulim me internet*
- b) Tatimpaguesit që përfshihen nga detyrimi për të lëshuar faturë, sipas ligjit për faturën dhe sistemin e monitrit të qarkulimit;*
- c) Tatimpaguesit të cilët përmbushin njëkohësisht kriteret e mëposhtme:*
 - i. Nuk janë subjekt i tatimit mbi vlerën e shtuar;*
 - ii. Kanë përgjegjësi tatimore të tatimit mbi të ardhurat personale nga biznesi;*
 - iii. Nuk kanë më shumë se një vendndodhje të ushtrimit të veprimtarisë së biznesit.*
 - iv. Kanë statusin kategorinë e punësimit “I vetëpunësuar i vetëm.*

3. Terminali “POS” është pajisja që bën të mundur përdorimin e kartave bankare në një pikë shitjeje. Informacioni për pagesën merret nëpërmjet faturave letër nga terminalët mekanike ose elektronike.”.

Neni 7

Në nenin 65, pika 1 ndryshon me përmbajtje si më poshtë:

“1. Tatimpaguesi dorëzon deklaratën tatimore në mënyrë elektronike nga llogaria e tij në sistemin informatik të administratës tatimore.”.

Neni 8

Në nenin 67, bëhen keto ndryshime:

1. Në pikën 2, togfjalëshi *“brenda 36 muajve”* zëvendësohet me togfjalëshin *“brenda 24 muajve”*.

2. Pas pikës 4, shtohet pika 5 me përmbajtje si më poshtë:

“5. Deklaruesi i Deklaratës Vjetore të të Ardhurave Personale mund të korrigjojë deklaratën e dorëzuar, brenda 6 muajve nga data e dorëzimit por jo më shumë se dy herë.”.

Neni 9

Në nenin 69, bëhen ndryshimet si më poshtë:

1. Pika 1 ndryshon me përmbajtje si më poshtë:

“1. Administrata tatimore, brenda 10 ditëve kalendarike nga data e llogaritjes së vlerësimit prej saj, i dërgon tatimpaguesit njoftimin e vlerësimit tatimor dhe kërkesën për pagesën e detyrimit tatimor:

a) në rrugë elektronike, në përputhje me legjislacionin e komunikimeve elektronike, kur njoftimi i vlerësimit është nënshkruar elektronikisht; ose

b) nëpërmjet shërbimit postar rekomandë, në rastet kur njoftimi i vlerësimit nuk është i nënshkruar elektronikisht.”.

2. Në pikën 2, shkronja “a” ndryshon me përmbajtje si më poshtë:

“a) emrin dhe mbiemrin e tatimpaguesit, person fizik, ose emrin e entitetit, adresën e selisë dhe adresën elektronike.”.

3. Në pikën 4, në fund të fjalisë së dytë shtohet togfjalëshi *“ose në format elektronik.”.*

Neni 10

Në nenin 71, në pikën 1, shkronja “e”, togfjalëshi “150 000 lekë” zëvendësohet me togfjalëshin “100 000 lekë”.

Neni 11

Në nenin 71/1, pas pikës 5, shtohet pika 6 me përmbajtje si më poshtë:

“6. Në rast se tatimpaguesi nuk ka dorëzuar deklaratën e TVSH-së brenda afatit të përcaktuar në ligj, sistemi elektronik i administratës tatimore, brenda 24 orëve nga përfundimi i këtij afati, plotëson dhe dorëzon automatikisht deklaratën e TVSH-së mbi bazën e të dhënave të librit të shitjes dhe të librit të blerjes. Përgjegjësia për çdo penalitet për mosdorëzimin e saj në afat, i ngarkohet tatimpaguesit, i cili ka të drejtën ta kontrollojë, ndryshojë apo korrigjojë deklaratën, sipas procedurës dhe afateve të këtij ligji.”.

Neni 12

Në nenin 75/1, pas pikës 1/2, shtohet pika 1/3 , me përmbajtje si më poshtë:

“1/3. Kërkesat për rimbursim të tatimpaguesit, për të cilin ka të regjistruar një çështje hetimore në proces, për konsumimin e veprës penale të krijimit të skemave mashtruese me TVSH-në apo fshehje të të ardhurave, parashikuar nga neni 144/a ose neni 180 të Kodit Penal, pezullohen deri në përfundim të veprimeve hetimore.”.

Neni 13

Në nenin 76, pas pikës 4, shtohet pika 5, me përmbajtje si më poshtë:

“5. Përjashtimisht nga parashikimi në pikën 4, kamatëvonesat e parashikuara nga ky ligj nuk zbatohen për njësitë e qeverisjes qendrore dhe njësitë e vetëqeverisjes vendore, në rastet kur mosdeklarimi brenda afatit ka ndodhur si pasojë e:

- a) zbatimit të një akti ligjor apo nënligjor me efekte prapavepruese; ose*
- b) zbatimit të një vendimi gjykatë të formës së prerë.”.*

Neni 14

Në nenin 96, pika 4 ndryshon me përmbajtje si më poshtë:

“4. Procedurat që do të zbatohen për shitjen e pasurisë së konfiskuar, në zbatim të aktit administrativ të konfiskimit, përcaktohen me vendim të Këshillit të Ministrave, me propozim të Ministrit përgjegjës për financat.”.

Neni 15

Në nenin 105, në pikën 2, shtohet shkronja “c” me përmbajtje si më poshtë:

“c) Kryejnë verifikimin dhe vlerësimin tatimor në përputhje me përcaktimet e Kreut VIII të këtij ligji në të gjitha rastet e konstatuara të konsumimit të veprës penale të fshehjes së të ardhurave kur vlera e tatimit, taksës apo kontributit të fshehur nuk është llogaritur paraprakisht sipas kreut X të këtij ligji. Vlerësimi tatimor dhe nxjerrja e njoftim vlerësimit në këto raste bëhet vetëm pas autorizimit nga Drejtori i Përgjithshëm të Tatimeve.”.

Neni 16

Në nenin 115/1, bëhen ndryshimet si vijon:

1. “Në pikën 2 dhe 3, togfjalëshi *“të nenit 36 të ligjit nr. 8438, datë 28.12.1998, “Për tatimin mbi të ardhurat”, të ndryshuar”* zëvendësohet me togfjalëshin *“të nenit 32 të ligjit nr. 29, datë 30.03.2023, “Për tatimin mbi të ardhurat”, të ndryshuar”* në secilin rast.
2. Në pikën 3, togfjalëshi *“në nenin 36/5 të ligjit”* zëvendësohet me togfjalëshin *“në nenin 37 të ligjit”*.

Neni 17

Në nenin 116, pika 2, shkronja “c” ndryshon me përmbajtje si më poshtë:

“c) Pika 4, e nenit 123, të këtij ligji.”.

Neni 18

Në nenin 124/1, pas pikës 2, të shtohen pikat 3 dhe 4, me përmbajtje si më poshtë

“3. Prodhuesi ose mirëmbajtësi i softëare-it, programi i të cilit përdoret nga subjekti që lëshon fatura, që për rastet e konfiskimit të pajisjeve fiskale, nuk bashkëpunon me administratën tatimore, me kërkesë të saj për hapjen ose verifikimin e pajisjeve ku është instaluar ky program, dënohet me gjobë 1 000 000 (një milion) lekë për këtë shkelje.

4. Në rast se prodhuesi ose mirëmbajtësi i softëare-it, i cili është gjobitur sipas pikës 3 të këtij neni, refuzon për herë të dytë, pa shkaqe të arsyeshme, bashkëpunimin me administratën tatimore, Komisioni i Përhershëm për monitorimin e tyre, në përputhje me aktet nënligjore në fuqi, harton një relacion sqarues dhe i propozon titullarëve të institucioneve, që kanë miratuar certifikimin, marrjen e masës së shfuqizimit të certifikatës. Titullarët përkatës vendosin nëse certifikata do të shfuqizohet ose jo.”.

Neni 19

Ky ligj hyn në fuqi 15 ditë pas botimit në Fletoren Zyrtare.

KRYETAR

NIKO PELESHI